

BUAH HATI BERLAINAN AGAMA

Hubungan sebagai kawan satu sekolah bertukar menjadi sayang



Saya gadis berumur awal 20-an. Pada penghujung tahun 2014 saya berkenalan dengan seorang lelaki yang lebih muda dua tahun ketika kami belajar di sekolah sama.

Sejak itu, hubungan sebagai kawan bertukar menjadi saling menyukai. Awal tahun lalu, saya menjadi teman wanitanya dan kini hubungan kami menjangkau setahun dan makin serius.

Walaupun bukan Islam, dia menghormati saya.

Bagaimanapun, saya bimbang hala tuju hubungan kami. Mustahil keluarganya sanggup menerima saya walaupun kami belum berbincang secara serius kerana faktor usia kekasih yang masih belum matang.

Saya runsing memikirkan hal ini, tambahan pula, dia ada melamar saya untuk menjadi isterinya dan sanggup memeluk Islam. Bantulah saya.

DAHLIA
Pulau Pinang

Ada beberapa perkara perlu diberi perhatian. Saya akan memokuskan fokus kepada beberapa hal penting agar dapat membantu anda mengambil tindakan sesuai.

Pertama, kesediaan anda untuk berterus terang dengan keluarga. Persediaan ini meliputi kesesuaian masa, tempat serta orang yang ingin dikongsikan. Dalam hal ini, anda perlu benar-benar bersedia. Rancang percakapan supaya tidak menimbulkan kejadian tidak diingini. Anda perlu bijak mengawal emosi supaya perkongsian itu tidak memberi kesan emosi negatif.

Jika belum bersedia, anda perlu merancang bilakah masa paling sesuai. Jika perlu bantuan dan sokongan orang terdekat, kenal pasti siapakah yang anda rasakan sesuai untuk menjadi orang tengah antara anda dan keluarga.

Kedua, anda berdua perlu mencapai kata sepakat jika benar-benar serius untuk mendirikan rumah tangga. Namun, semak segala keperluan yang perlu ada sebelum mendirikan rumah tangga.

Jika teman lelaki sedia memeluk Islam, sebaiknya anda merujuk dia kepada pihak lebih pakar. Selain panduan untuk memeluk Islam,

anda juga perlu menerima segala risiko yang mungkin berlaku di peringkat seterusnya.

Ketiga, anda juga perlu faham aspek kematangan. Menerusi perkongsian ini, anda beritahu isu jarak umur dengan teman lelaki dan ketidakmatangannya untuk mendirikan rumah tangga. Lebih baik anda

berbincang bersama terlebih dahulu. Jika rasa masih perlu banyak belajar dan bersedia ke arah perkahwinan, ambil peluang untuk memperbaiki kelemahan yang ada.

Anda masih boleh meneruskan hubungan akrab seperti sebelumnya tapi pastikan tidak melanggar hukum agama. Jika berkesempatan,

dapatkan khidmat kaunseling secara bersemuka bagi membincangkan hal ini dengan lebih kondusif. Perkahwinan campur sangat digalakkan sebagai satu usaha dakwah. Pun begitu, anda perlu merujuk keluarga sebelum membuat sebarang keputusan.

